

REVISTA SITUASAUN – JANEIRU 2017

ASUNTU NE'EBÉ PRESIZA TAU ATENSAUN

- ▶ **Insidente Violénsia Rejista ho Númeru Aas Tanba Tua Lanu Bainhira Vizita Malu iha Tinan Foun 2017;**
- ▶ **Insidente Envolve Grupu Arte Marsiál (GAM) no Arte Ritual (GAR) iha Dili Tun Maibé Sae iha Baukau no Likisá;**
- ▶ **Ema Na'in 5 Mate, Deskonfia Ema Mak Oho no Oho-an Rasik Tanba Problema Família;**
- ▶ **Insidente 4 Akontese iha Loja Xinés.**

INSIDENTE VIOLÉNSIA REJISTA HO NÚMERU AAS TANBA TUA LANU BAINHIRA VIZITA MALU IHA TINAN FOUN 2017

Belun ho nia Sistema Atensaun no Responde Sedu (AtReS) iha fulan Janeiru 2017 rekolla insidente violénsia hamutuk 129. Númeru ne'e konsidera sa'e fali, hafoin tun iha Dezembru 2016 ho total insidente 105. Tuir dadus monitorizasaun, iha insidente violénsia 27 mak akontese iha loron 1 Janeiru 2017. Karakterístika husi insidente ne'ebé akontese iha loron 1 Janeiru mak, ema vizita malu hodi hato'o "Boas Festa Natal no Tinan Foun" no iha tempu ne'ebá sira oferese hahán no tua ba malu hodi hemu to'o lanu no balun komesa konta sira nia problema pasadu hanesan problema GAM, disputa rai, problema fetosaa no uma-mane, hodi provoka dezentendimentu no to'o ikus balun la simu malu entaun sira baku malu. Iha fulan Janeiru rejista mós karakterístika insidente violénsia hanesan; Insidente 43 ho karakterístika "Hemu Tua Lanu". Númeru ne'e konsidera sa'e maka'as kompara ho númeru average (*rata-rata*) durante fulan 12 ikus (Janeiru-Dezembru 2016) ho insidente 25.4 kada fulan; Insidente 20 ho karakterístika "Viziñu Hahú Halo Violénsia". Númeru ne'e mós konsidera sa'e maka'as kompara ho númeru average (*rata-rata*) durante fulan 12 ikus (Janeiru-Dezembru 2016) ho insidente 10.8 kada fulan.

INSIDENTE ENVOLVE GRUPO ARTE MARSIAL (GAM) NO ARTE RITUAL (GAR) TUN IHA DILI MAIBÉ SAE IHA BAUKAU NO LIKISÁ

Iha Janeiru, Sistema AtReS mós rejista insidente 9 mak envolve Grupu Arte Marsiál (GAM) no Grupu Arte Ritual (GAR). Maske númeru ne'e konsidera tun kompara ho fulan Outubru to'o Dezembru 2016 maibé tuir observasaun AtReS, insidente ne'ebé baibain akontese iha kapitál Dili ho númeru aas maibé iha Janeiru akontese dala 1 de'it, no insidente liga ba GAM no GAR rejista fali ho númeru aas iha Baukau ho insidente 6 no iha Likisá insidente 2.

Total Insidente Violénsia iha Janeiru 2017	
Munisipiu	Insidente
Aileu	4
Ainaru	9
Baukau	11
Bobonaru	2
Covalima	4
Dili	51
Ermera	6
Lautein	3
Likisá	11
Manatutu	6
Manufahi	8
Oekusi	4
Vikeké	10
Total	129

Insidente Liga ba GAM no GAR mak hanesan:

Iha Munisipiu Baukau (insidente 6)

- Iha Suku Buibau, Postu Administrativu Baukau akontese insidente 3:
 - Iha Aldeia Loidau akontese insidente 1, bainhira grupu ida ba vizita mate uma no to'o iha dalan klaran hetan asaltu husi grupu ne'ebé ho kondisaun lanu no insidente ne'e iha relasaun ho problema GAM iha pasadu;
 - Iha Aldeia Samalakuliba akontese insidente 2, bainhira joven na'in rua fila husi Merkadu no to'o iha dalan hetan asaltu husi grupu joven seluk ne'ebé hein hela. Insidente ida seluk akontese iha área eskola bainhira halo limpeza. Insidente rua ne'e iha relasaun ho problema GAM;
- Iha Aldeia Oralan, Suku Vemasse Tasi, Postu Administrativu Vemasse (akontese insidente 2). Insidente ida akontese bainhira grupu rua asalta malu momentu sira ba hariis tasi (picnic) no insidente ida seluk, grupu ida mak halo asaltu ba joven ida. Insidente rua iha Vemasse ne'e mós iha relasaun ho problema GAM;
- Iha Aldeia Lakoda, Suku Seical, Postu Administrativu Baukau akontese membru eis-GAM ida halo asaltu ba pesoál PNTL ida to'o kanek grave bainhira pesoál PNTL ne'e halo viajen husi Lautein mai Dili.

Iha Munisipiu Likisá (insidente 2) – Insidente ida akontese iha Aldeia Vatu-Nau, Suku Vatu-Vou, Postu Administrativu Maubara ne'ebé membru eis-GAM ida taa eis-GAM ida seluk to'o hetan kanek grave no insidente ida seluk akontese iha Aldeia Morae, Suku Vaviquina ne'ebé membru Grupu Arte Ritual halo asaltu ba membru eis-GAM ida to'o kanek grave tanba eis-GAM ida ne'e husu atu koko forsa (sparing).

Iha Munisipiu Dili (insidente 1) – Insidente akontese iha Aldeia 01, Suku Mascarinhas, Postu Administrativu Vera Cruz ne'ebé estudante asaltu malu iha kompetisaun eskola nian to'o vidru eskola nian balun rahun. Insidente ne'e iha relasaun ho problema GAM.

EMA NA'IN 5 MATE, DESKONFIA EMA MAK OHO NO OHO-AN RASIK TANBA PROBLEMA FAMILIA


Iha Janeiru 2017 rekolla insidente violénsia hamutuk 5 ne'ebé rezulta ema lakon sira nia vida. Karakterístiku husi insidente 5 ne'e mak: **Insidente 2 Akontese Liga ba Adat ka Lisan** - iha Aldeia Quirlelo, Suku Dato, Postu Administrativu Likisá akontese feto ida ho kondisaun isin-rua ba tara-an no mate tanba nia família husu folin ne'ebé boot ba mane-foun, nune'e mane-foun la simu. Insidente ida seluk akontese Iha Aldeia Fatugama, Suku Meti-Aut, Postu Administrativu Cristo Rei ne'ebé katuas ida deside tara-an no mate tanba frustradu ho nia oan ne'ebé mate tui-tuir malu no deskonfia iha presau liga ho adat no lisan ne'ebé la halo tuir. **Insidente 2 Kauza Ema Mate Tanba Konfrontasaun Entre Grupu** - iha Aldeia 7 de Dezembru, Suku Comoro, Postu Administrativu Dom Aleixo akontese feto ida nia família

hakarak lori fila sira nia oan feto iha fatin festa ba uma tanba kalan boot ona, maibé grupu joven ida ho kondisaun lanu halo impedimentu to’o ikus mosu baku malu no rezulta joven mane ida mate bainhira lori ba Hospital Nasionál Guido Valadares. Insidente ida seluk akontese iha Merkadu Belebato, Suku Ailili, Postu Administrativu Manatutu ne’ebé grupu asaltu malu tanba odi malu vingansa nune’e sira uza sasán kro’at hanesan katana, tudik, ai-dona no rezulta joven ida mate tanba taa ho katana no sona ho tudik, ema na’in 6 kanek todan no sunu uma 1. **Insidente 1 Deskonfia Tiru-an rasik** akontese iha Aldeia Wedalac, Suku Bairro-Pite, Postu Administrativu Dom Aleixo, ne’ebé membru PNTL ida deskonfia tiru nia an rasik no mate, maibé ema seluk deskonfia kazu ne’e la’ós tiru-an tanba bainhira hetan mate isin, ninia pistola rasik sei iha nia fatin.


INSIDENTE 4 AKONTESE IHA LOJA XINÉS

Sistema AtReS mós iha Janeiru 2017 rekolla insidente violénsia hamutuk 4 ne’ebé akontese iha loja Sidadaun Estranjeiru Xinés. Maske número ne’e konsidera ki’ik, maibé karakteristik ne’e foin mosu ho número boot (akontese dala 4 iha fulan 1 nia laran). Insidente ne’ebé akontese iha loja Xinés mak hanesan: **Insidente 2 akontese iha Munisipiu Ermera** - iha Aldeia Moris Foun, Suku Talimoro, Postu Administrativu Ermera (akontese dala 2) ne’ebé joven ida ho kondisaun lanu halo asaltu ba Xinés ida sem razaun, no insidente ida seluk, katusa ida fakar hahán manas ba feto Xineza ida tanba husu atu troka nia telemovel ne’ebé nia sosa ona durante fulan ida depois aat no obriga Xineza ne’e troka fali foun. **Insidente 1 akontese iha Munisipiu Likisá** - iha Aldeia Leopa, Suku Dato, Postu Administrativu Likisá ne’ebé estudante na’ok Xinés nia sasán tanba ne’e Xinés baku nia, la kleur estudante ne’e mai ho grupu boot ida hodi baku Xinés ne’e to’o kanek grave no lori ba Ospital Likisá hodi halo tratamentu. **Insidente 1 akontese iha Dili** - iha Aldeia Audian, Suku Santa Cruz, Postu Administrativu Nain Feto ne’ebé joven ida na’ok pulsa telefone Xinés nian kuaze tahan 4000 resin to’o ikus comunidade kaer no baku joven ne’e.


KARATERÍSTIKA INSIDENTE




Insidente Fatin




Tipu Violensia




Metodu Violensia



Hun no Abut Konfliktu




See Mak Hahu / Halo Violensia?




Ema Ne'ebe Hahu Violensia Nia Jeneru saida?




Vitima Nia Jeneru



See Mak Responde?



Impaktu



ATIVIDADE PREVENSAUN NO RESPONDE BA KONFLITU

Atividade Ne'ebé Hala'ó Husi Ekpa Sistema Atensaun no Responde Sedu (AtReS)

- ▶ Iha loron 20 Janeiru 2017 realiza enkontru trimestre iha Postu Administrativu Metinaro, Munisipiu Dili ho tema jerál "Asegura ba Seguransa iha Eleisaun 2017, Liu Husi Partisipasaun Komunitade Hotu". Partisipa iha enkontru ne'e partisipante kuaze na'in 120 ho orador prinsipál hanesan, Administrador Postu Metinaro, Komandante Naval F-FDTL Metinaro no Komandante Terestre F-DFTL Postu Administrativu Metinaro no Komandante Eskuadra PNTL Metinaro.



- ▶ Governu Estadus Unidas Amérika liu husi Embaixada iha Timor-Leste organizasaun espozisaun ida iha Timor Plaza iha loron 21 Janeiru 2017 hamutuk ho nia parseiru sira. Tema ba espozisaun mak "Amérika ho Timor-Leste Hamutuk Dezenvolve Futuru". Belun mós partisipa hodi hatudu relatóriu hanesan Revista Situasaun, Alerta, Relatóriu Polítika no hatudu mós Belun nia website foun ne'ebé sei lansa iha tempu besik.

Atividade Ne'ebé Hala'ó Husi Ekpa Programa Apoiu Polisiamentu Komunitária (PAPK)

- ▶ Belun liu husi Programa Apoiu Polisiamentu Komunitária (PAPK) hamutuk ho PNTL organiza enkontru Trimestral Feto Konsellu Polisiamentu Komunitária (FKPK) iha Munisipiu Vikeké hodi fahe informasaun ba iha estrutura FKPK kona-ba seguransa durante fulan 3 ikus (Novembru 2016 to'o Janeiru 2017). Enkontru ne'ebé halo iha loron 16 Janeiru 2017 hodi identifika issu seguransa ligadu ho asuntu feto, prevene no kombate krime. Alende halo atividade nivel munisipiu, PAPK mós halo enkontru KPK regular iha nivel Suku hamutuk 27 iha fulan Janeiru iha Munisipiu Dili, Likisá, Covalima, Manufahi no Vikeké. Husi enkontru 27 ne'e, iha Suku rua mak komesa finansia ona ho fundu husi PNTL hanesan Suku Betano no Letefoho iha Postu Administrativu Same, Manufahi.



- ▶ Programa Apoiu Polisiamentu Komunitária (PAPK) hamutuk ho PNTL mós organiza enkontru Trimestral Konsellu Seguransa Munisipiu (KSM) iha Munisipiu Vikeké hodi fahe informasaun ba membru estrutura KSM kona-ba asuntu seguransa durante fulan 3 ikus (Novembru 2016 to'o Janeiru 2017). Enkontru ne'ebé hala'ó iha loron 17 Janeiru 2017 mós ho objetivu identifika issu foun hodi prevene no kombate krime.



Atividade Ne'ebé Hala'ó Husi Ekpa Mediasaun no Rezolusaun ba Disputa Rai (MRDR)

- ▶ ONG Belun liu husi Programa Land Mediation and Resolution Dispute (LMRD) fasilita treinamentu ba representante juventude husi Suku balun ne'ebé pertense ba Munisipiu Dili kona-ba oinsá bele sai mediator iha konfliktu liuliu konfliktu liga ba rai. Joven na'in 10 kompostu husi feto no mane mak partisipa iha treinamentu ne'e. Treinamentu ne'e hala'ó durante loron 2 nia laran komesa husi loron 24 to'o 25 Janeiru 2017. Programa ne'e realiza tanba hetan suporta husi GIZ-Fundu ba Dame.



KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konfliktu husi koleasaun dadus monitorizasaun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, husi Postu Administrativu 65, Suku 208 iha Timor-Leste durante fulan Janeiru 2017. Belun esforsu atu fahe informasaun ne'ebé up-to-date no serteza ho dadus atuál. Haino katak, bele hetan mudansa situasaun ho lalais husi kontribuisaun dame ita hotu nian. Ami agradece no simu informasaun seluk ne'ebé bele klarifika ka update dadus, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Especialista Prevenasaun Konfliktu & Polítika: laurensius.belun@gmail.com